

Le prèmié mêrieü

Din le tin inô damou Degné, su le tsemîn kiè va utre a la ris, i l' avive on n' indraï yô l' avive on petchou velâdze kiè s' apêlâve Li z' Étêlâ.

Din sé velâdze l' avive on n' omoueu é onna fêmale, Fransouê é Zéfîne, l' ér'on frère é souaïre é rèstâv'on insinble din onna maïzon apondinte a la grandze.

I l' ér'on kiaï li. I travayev'on dou u traï bouokonè dè vegne bâ pè le Ponton é yon u sondzon dè Revouaïre.

Dïnse, i l' aviv'on preü dè vîn a la kâve pouo to l' an. I l' aviv'on inkouo dè biô morsé dè prô pouo vouardâ onna vatse, on mouodzou, onna tchievre é on mouelè kiè l' ére inkouo borgne, sin ublâ le kayon pouo la boutsèri.

Kin on li vèyeve, dè tin z' in tin, le demindze dèvan la maïzon, on s' aparsèyeve preü kè l' uzav'on pâ onna savouonète pè dzo.

D' eüton, apri li venindze, kin l' aviv'on fouernaï dè remizié li pouome, li pèri é to sin kiè l' aviv'on din le kouerti, i keminsiev'on d' alâ vère, bâ pè le beü, se le kayon l' è dabouo prè pouo la danse du tranbetsè.

Intre tin Zéfîne, yé, i mètive le bâ u mouelè pouo portâ le fèmi u prô inô dézo Rion. On la vèyeve dè kou mouodâ inô pè le vayon, d' onna man i teniève la brede du mouelè é dè l' âtre le tsapèlè. Kin Zéfîne rêmouâve li pouo, pouo prèyé, le mouelè brinlâve la tite dè rire.

Fransouê, lui, l' alâve inô pè la dzeu, dèsu la ris, preparâ dè bou pouo d' ivê.

L' è jestamin inô li kè l' a z' u la pié grôs'a pouaïre dè sa via. In refatin din la dzeu, i l' a yu dè vièye bouaïte dè konserve vouide pouaï on petchou kâdre kiè peleyeve din l' êrbe. Fransouê l' a pouaï amasô le kâdre, le l' a vrea din la man é l' a fouotu onna monstr'a rekanpâye ... Non dè blu dè non dè blu ... l' è pap' a no ! Pouortan yeu si pâ fou, mi din le machîn se, l' è pap' a no.

To t' ésarvadja, l' a mètù le kâdre din la fate, l' a amasô li z' outi é l' è tornô mouodâ bâ a maïzon. Bâ pè le vayon i pinsâve ... Pap' a no l' è mà l' a dja dje z' an, pour mè l' è u purgatouâ é l' è revèneü pouo no démandâ dè prèyère. A ni, vouaï alâ bâ vè l' inkouerâ laï bayé pouo onna mèse.

Di sé dzo li, Fransouê l' a keminsia a tabèyé, i l' è tan z' u ésarvadja kè pouezive pâ mi ni medjé ni dremi.

Zéfîne, yé, l' ére to t' in sousi dè vêre Fransouê kemin l' avive tchandja é l' a inkouo pinsô kè l' ére pètitre onna fèmale kiè le tormintâve u bîn kè l' avive apia le filoséra bâ pè la vegne.

Kâkiè dzo pié tâ, Zéfîne l' a itô fire la kieütse a Fransouê é l' a trovô le kâdre dézo la payase.

Dèk l' è sose pouo onna tsouze ? Kin i s' è aradâye dedin é kè l' a yu la pouetratse kiè l' ére din sé machîn, l' a fouotu onna monstr'a kafolâye é l' a pinsô : Te vaï kè mè si pâ tronpâye, l' è preü onna fèmale kiè laï baye tan dè sousi.

Dèman matîn vase laï dere : Mon poure Fransouê, se t' â pâ d' âtre mi joleye fèmale kiè hla kiè l' è din le kâdre pouo frekantâ, i vô pâ la péne dè pâ mi medjé ni dremi min te fî !

Pouo fouerni, l' è le vieü brakouonié Tsèzô kiè l' a pasô on dzo inô pèr li, kiè leu z' a esplekô kè, sé kâdre li, i l' ére on machîn pouo s' aradâ dedin, sin kè djon on mérieü.

Di sé dzo, Fransouê l' a pâ mi z' u manke d' alâ s' aradâ din la fènitre du beü pouo sè razâ.

Sé d' Ârtse